

LEGLIZ KATOLIK SESEL



Let pastoral: Nwel 2024

Let pastoral alokazyon Nwel 2024

'Al dan lape Kris'

1. Zour Nwel, nou selebre nesans Zezi, *Prens lape*, avek gran lazwa. Pour sa lokazyon, mon envit zot pou fer lapriyer sa manman ki annan en zanfan otis - ki son lapriyer i vin nou lapriyer : *'Ki mon leker, Zezi, i vin ou Betlehem.'*
2. Annefe, ser frer ek ser Seselwa, tou keksoz i komans dan leker. 'Leker i sa landrwa pli profon dan sak dimoun'. Annou akey Zezi, Lape, pli gran kado ki Bondye i'n ofer limanite, dan sakenn nou, dan sak fanmir e dan lasosyete seselwa. Nou limanite pe ganny desire par tro bokou laenn ek divizyon. Sen Pol i demann nou pou les 'Kris reste dan nou leker par lafwa ; ki nou reste anrasinen dan lanmour, etabli dan lanmour'. (Efezyen 3 vers 43).
3. Pandan sa lannen 2025, lasosyete Seselwa pou viv en moman vreman enportan avek eleksyon Prezidan Larepublik ek bann manm lasanble lezislatif. Zot pou ganny en manda senk an. Pandan sa lannen eleksyon, ki mannyer nou kapab vin bann artizan lape avek Zezi e par Zezi, personnelman me osi koman en Kominote - dyosez, parwas, fanmir, mouvman, servis ?
4. Zezi, i sa Lape ki nou'n gannyen. Zezi i angaz nou dan nou fason viv lapolitik. Ki mannyer nou pou kapab viv sa kanpany elektoral e reste an akor ant nou parol ek nou aksyon, an akor ant nou lapriyer ek nou latitid e an akor ant nou lafwa ek nou lavi toulezour.
5. Nou bann langazman, ki enkli langazman politik, i komans avek Zezi-Kri Resisite. Nou akey Zezi dan en fason spesyal pandan lanmes. Par pwisans Lespri Sen, dan lakominyon avek Zezi - dipen ki sorti dan lesyel – nou ganny rekonsilye avek Bondye nou Papa, avek lezot, avek nou-menm e avek lakreasyon an antye.
6. Avek rekonesans, pandan sak lanmes (lekaristi), nou dekouver ki nou tou nou ganny envite otour en menm latab, pou partisip dan en menm repa, akoz nou bann frer ek ser dan Kris. Nou zanfan en menm Papa, Bondye, malgre nou kouler politik, malgre kouler nou lapo, malgre nou metye etc. Sa parol i pa zis en fason koze ! Annefe, Sen Pol, dan son let pour bann Efezyen (sapit 4 vers 4) i dir ki : 'I annan en sel Senyer, en sel batenm, en sel Bondye e Papa tou dimoun'. Ensi, akoz nou annan menm lorizin, nou pa pou kapab tret nou bann frer ki annan en lot lopinyon politik ki nou, koman lennmi. 'Annou pa viv latitid Kaen vizavi nou frer.' Si nou anvi viv byen nou vokasyon koman kretyen, nou pa kapab annan bann santiman laenn, ni annan mepri pou bann ki annan en lot pwennvi politik ek nou. Lavi-Sosyal-Seselwa i form en sel lekor. Alor annou pa les eleksyon, ni nou bann lanbisyon personnel detri e desir linite nou lavi-sosyal. Lobzektif politik i en keksoz nob : se promouvwar en meyer proze pour lasosyete an antye. Nou kapab annan diferan swa politik, wi ! Me, vin lennmi kanmarad akoz politik, non ! Akoz nou, nou bann

frer ek ser dan limanite. Sa ki ini nou se en sel Bondye e Papa. Me osi, nou form parti en sel pep, pep Seselwa. Sa i bokou pli enportan ki nou bann diferans politik. Sak lopinyon politik i toudmenm lezitim dan limenm.

Senyer pran pitye ler nou bann parol ek nou bann aksyon vyolan e lezot provokasyon i desir nou sosyete ek linite Legliz.

O Kris pran pitye ler nou tret dimoun ki napa menm lopinyon politik avek nou koman en lennmi. Ler nou kre bann miray separasyon antre nou, menm pandan lanmes.

Senyer pran pitye ler bann nouvel i anpes deba zis, neserer, lezitim e demokratik. Ler lo rezo sosyal nou pibliy bann parol e bann zimaz pou zis bles dimoun, pou detri fanmir, pou sali repitasyon dimoun e zot lavi prive.

8. Pran letan pou ekout Parol Bondye, pou ekout kanmarad menm ler nou pa dakor ek kanmarad ; Sa i o sant nou lafwa bibliik.

Byensir, Parol Bondye pa donn nou lenstriksyon pour ki nou bezwen al vote. Se pour sa rezon ki Legliz i respekte konsyans sak dimoun dan swa politik ki i fer. Akoz konsyans sak dimoun i sakre. Napa personn, ni okenn parti politik ouswa lasosyasyon ki annan drwa aste konsyans dimoun, manipil lespri dimoun e enfliyans vot en dimoun par larzan, lalkol, ouswa drog. Si lansennyman Legliz i rapel klerman ki vote i en devwar pour tou sitwayen ki mazer, lotorite legliz, bann responsab : (levek, pret oubyen dyak), oubyen bann responsab bann mouvman ek servis dan Legliz, pa la pou donn okenn konsiny pour ki kandida en dimoun i devret vote. Vote, i en devwar sivik. Vote i en desizyon personnel. Vote i lib. Vote i ganny fer dapre konsyans sak dimoun, savedir san okenn presyon. Mon envit tou bann parwas, bann mouvman ek bann servis dan Legliz Katolik pou reste vizilan pou veye ki sak dimoun, ler i pe vote, i ganny sans fer en swa lib. Alor si en dimoun i enplike direkteman dan politik, pandan letan kanpanya eleksyon i pou bezwen reste alekar dan bann responsabilite Legliz: konsey ekonomik, konsey pastoral, ensi ki dan bann servis parey lalitrizi, bann travay karitatif oubyen formasyon.

9. Par kont, Parol Bondye dan konteks lansennyman Legliz, i en vre lalimyer enportan ki edik e ekler nou konsyans. I ofer nou bann lendikasyon e bann lezizans pou promouvwar en sosyete pli zis e pli fraternel atraver lapolitik. Lekritir Sent i donn nou bann lansennyman, sirtou ler nou kontanple ki mannyer Bondye i azir, spesyalman par son sel Garson, dan listwar limanite, dan lamars ver son Rwayonm.

9a. Ensi, Lekritir Sent i met nou angard kont diferan zidol. Bondye i dir : *‘Ou pa pou annan okenn lezot bondye apard mwan. Ou pa pou fer okenn zidol.’* (Egzod 20 vers 3 – 4 a.) I vre ki politik i tre enportan dan lavi tou sosyete imen, akoz se politik ki organiz lavi en pei atraver lezislasyon e atraver bon gouvrenans. Dapre lepap Pie XI *« fer politik se fer lasarite dan son pli gran laform. »* Annou remersye Bondye pour bann zonm ek bann fanm ki angaz zot dan lapolitik e ki met zot oservis pou fer dibyen dan lasosyete. Annou ankouraz bann kretyen pour zot angaz zot dan politik pour zot partaz bann valer levanzil avek tou limanite. Pourtan, dan okenn sirkonstans, politik pa kapab vin en larelizyon e, plis ankor, politik pa kapab pran plas Bondye. Zezi i’n dir nou : *« Rann Sezar sa ki pour Sezar e rann Bondye sa ki pour Bondye. »* (Lik 20 vers 25). *‘Politik i enportan me i pa devret vin nou bondye.’*

- 9b. Tou dimoun, pli spesyalman bann ki pli pti ek bann pov zot annan en gran valer dan lizye Senyer. Labib i dir nou ki Bondye i pran swen avek son pep: *I protez li, I pran swen avek li, i vey lo li parey I gard son kannet lizye.* (Deteronnm 32 vers 10). Tou elekter i devre reste vizilan e veye ki bann kandida ek zot bann program politik i promouvwar lazistis sosyal, I defann lafanmir e protez bann valer tradisyannel, i vey lo drwa en bon ledikasyon e en meyer swen lasante pour tou dimoun. Ki program politik i respekte drwa ek dinite imen depi lakonsepsyon ziska lanmor san okenn demagozi. Dan okenn sirkonstans bann kandida *pa kapab enterese zis avek ganny vot bann dimoun aze, vilnerab e frazil, san ki zot enterese osi pou pran byen swen avek sityasyon ki sa bann dimoun i ladan, sirtou ler zot dan bann moman izolman e lasoufrans!*
- 9c. Parabol bon Samariten i rakonte ki mannyer sa Samariten ti arete e I ti pran swen avek en zonn ki bann bandi ti'n kit li demi mor, obor semen. Sa bon Samariten ti montre son konpasyon par bann aksyon konkre: I ti donn sa zonn ki tin ganny blese premye swen, I ti met li lo son prop bourik pou anmenn li dan en lotel, I ti fer sir ki sa zonn blese ti ganny tou latansyon ki I ti bezwen ziska ki sa zonn blese ti reganny son lasante. Sa bon Samariten, se Zezi limenn ! Nou tou nou'n ganny apele, par pwisans Lespri Sen, pou vin leker, labous, lanmen, kouraz ek lavolonte Zezi. Annou vin bann bon Samariten pour nou kanmarad. Annou montre grander nou vokasyon imen.

Dan nou sosyete, isi Sesel, ki mannyer nou pran swen avek nou bann frer ek ser ki'n ganny blese e kin tonbe obor semen ? Bann ki'n ganny blese par adiksyon drog e lezot adiksyon ? Ki mannyer nou pou anpes sa bann bandi, sa bann 'gro pwason' drog aret fer ditor nou bann dimoun ? Ki mannyer nou pou pran swen avek nou bann frer ek ser ki'n vin lesklav drog, ki'n ganny blese avek lavi, atraver en terapi ek reabilitasyon ? Ki mannyer nou pou akonpany dimoun avek zot fanmir pou ed zot sorti dan sa lanmizer nwanr, dan sa lanfer ? Tou sa bann kestasyon nou pou bezwen pe poz lasosyete. Sa, se en konba kompleks e difisil akoz sa bann mafia drog zot annan bann mwayen finansyel tre pwisan, ki kapab koronp lam bokou dimoun ki ganny tante par larzan fasil. Sa, se bann kestasyon ki napa larepons fasil. Sa bann vre kestasyon ki tre enportan i devre ganny met lo latab dan leker bann deba politik pandan sa prosen kanpany elektoral. Koumsa, i a provok langazman konkre bann diferan kandida ek bann parti politik pour sa senk an ki pe vini. Nou sosyete i ava ganny sans retrouv son lekilib e son bonn sante.

- 9d. Lansennyman Sosyal Legliz Katolik, sirtou lansiklik Lepap François 'Laudato si', i rapel nou ki later i en kado ki Bondye in donner pour tou limanite. Nou, imen, nou bann administrater lo sa later. Nou pa bann proprieter. Nou'n ganny apele pour nou devlop, protez e vey sa later. Dan liv Lazenez (sapit 2 vers 15), nou kapab lir : *'Senyer Bondye ti pran zonn e met li dan Zarden Edenn pou kiltiv li e pran swen avek li.'* Me, parfwa nou azir parey bann predateur ki detri tou. Nou napa respe pour nou lanvironnman. Devlopman en pei pa devret ganny mezire lo zis rezilta progre ekonomik, menm si sa i en lendis enportan. Se pour sa rezon ki tou politik ki merit sa vre non 'politik', i devret promouvwar program 'en lekoloji entegral'. Byennet tou dimoun (byen-komen) i devret pas avan lentere bann endividi oubyen bann group ki annan plis lenflyans. Dan larsipel Sesel, bann later ek bann zil i bezwen ganny byen administre pour ki sak sitwayen seselwa i kapab viv dan en lanvironnman favorab. I osi tre enportan pou vey lo nou leritaz ek nou patrimwann Seselwa. Sa i en kado

presye e eksepsyonnel ki noun gannyen. Ki nou leritaz ek nou patrimwann i ganny byen proteze pour byennet nou zenerasyon fitir. Osi, fodre fer atansyon 'Ki Seselwa pa vin lokater dan son prop pei !'

Eski pa i enportan pou prevwar, dan sak kanton, bann lespas lib, laverdir, bann zarden pour zanfandwe, bann plas kot dimoun i kapab zwenn ansanm pou detann, respire, repoze e pou viv bann aktivite rekreyasyonel? Ki mannyer nou pou sorti dan sa lozik kot nou ranpli partou ek zis beton. Alor, nou ganny envite pou poz kekyon bann kandida ek bann parti politik lo zot program konsernan ki mannyer pour pran swen e pou amenaz pli byen nou teritwar.

9d i. Se par sa fason ki nou konpran vre sans lofertwar pandan lanmes. Nou ofer dipen avek diven, fri later ek travay imen pour zot ganny transformen. Par lafors Lespri Sen ek travay bann imen, later i osi prepar nou pour nou antre dan Rwayonm Bondye ki'n vin posib par lanmor ek lareziyasyon Zezi.

10. 'Lakrwa i endik nou sa pasaz ver en lemonn kot tou keksoz i ganny konsakre.'
(D. Rimaud)

Zezi I sa dipen ki'n donn son lavi ziska mor lo lakrwa. Ler nou ekout lansennyman Zezi e kontanple ki mannyer I egzers son lotorite, son pouvwat, nou ganny envite pou viv sa lotorite - menm atraver lekzesis pouvwat politik- koman en servis ki nou pe rann. Zezi, Senyer, Lerwa liniver, ti lav lipye son bann disip Zedi Sen e i pe kontinnyen lav lipye tou bann imen, san fer okenn preferans krwayans ouswa lareziyon. Zezi I dir nou : *'Fis-de-Lonm pan'n vini pou li ganny servi me pou li rann servis.'* (Mark 10 vers 45). Annou demann Lespri Sen pou nou viv en vre disernman e vey byen pou asire ki bann kandida ki ganny bann responsabilite politik par nou vot, zot annan sa sans rann servis, sirtou anver bann pov ek bann dimoun ki pli vilnerab. Ki sa akse pouvwat politik pa zis vin koman en lavantaz kot bann kandida i mont lo en pye-des-tal pou rod zot prop laglwar me pou met zot o servi tou dimoun. Nou, bann elekte, nou pa devre servi nou vot oubyen nou lenflyans pou ganny benefis personnel e ensi ankouraz lakoripsyon ki pouri bokou lasosyete.

11. 'Ki nanryen pa perdi.' (Zan 6, 9-12) Ler Zezi ti fer miltiplikasyon dipen, - Zezi ti atantif pou vwar sa lafoul ki ti lafen – lafen lansennyman, lafen dipen. Atraver kontribisyon en zenn garson ki ti annan zis senk dipen ek de pwason, Zezi ti nourri en lafoul 5,000 zonn. Zezi ti envit son bann disip pou regroup lafoul par group environ senkant. I ti envit zot pou distribye dipen ek pwason e ranmas sa ki reste pour ki nanryen pa perdi (cf. Matye 14, 15-21).

En demokrasi i vivan si tou dimoun i ganny demande pou fer son prop kontribisyon. En sosyete i devlope si travay ek zefor ki dimoun i fer i ganny met an valer. Ki dimoun ki pa oule fer nanryen pa zis ganny lasistans e reste dan zot latitid lesefer. Isi Sesel, nou annan loportinite pou al vote tou le senk an. Sepandan, dan en demokrasi vivan bann sitwayen i devre ganny konsilte regilyerman e zot devret ganny enplike dan proses kot desizyon pe ganny pran. Sa fason fer, i enplik maksimonm dimoun espesyalman bann pov. Ki tou desizyon pa depan zis lo bann politisyen, me lo tou sitwayen e sirtou lavwa bann ki pli feb. Zot osi, zot touzour annan keksoz pour dir. Tro souvan zot la, zot reste pasif e viv dan 'les bato marse'. En lot pilye lademokrasi se lendepandans zidisyer me osi lezot antite entemedyer parey Labank Santral, bann 'ONG', bann Linyon etc. Laliberte lapres ekri ek lapres oral i osi enportan pour en demokrasi vin pli vivan, kot tou dimoun i santi li lib pou

eksprim zot, san lentimidasyon, san lafreyer ki zot ava ganny met dekote, ouswa ganny pini pli tar. Lo tou sa bann laspe, mon envit bann elekte pou rod byen zot lenformasyon, pou poz tou sa bann kestyon bann kandida avan ki zot fer zot swa, dan bwat vote, dapre zot konsyans. Annou veye ki nanryen pa perdi dan sa prosesis demokratik.

12. 'Al dan lape Kris.' I dernyen parol ki levek/dyak oubyen bann pret ki prezid lanmes i dir - lanmes ki tou lakominote bann kwayan pe selebre ansanm.

12a. 'Al dan lape Kris.' i oule dir : ou ki'n konminyen avek Zezi par Laparol ek par dipen lavi, par sa moman fraternel e moman lapriyer an kominote, ale, al travay pour lape par ou fason koze, par ou fason viv, par ou aksyon. Ale e annan respe pour lezot. Spesyalman pandan sa prosen kanpanya elektoral, annou swiv Zezi. Ale, avek Zezi e avek souf Lespri Sen.

12b. 'Al dan lape Kris' i oule dir osi ki ler nou konminny avek lekor Kris, parey Sen Pol i dir nou, nou form en sel lekor, setadir: ansanm nou en sel fanmir. Ale, e ki nou bann kominote kretyen I vin bann sinny profetik sa lakominyon kot nou travay pour larmoni – fri lape – tou dilon sa kanpanya elektoral. Pou fer sa, annou pa afebli bann deba e annou pa kasyet anba tapi nou bann dezakor, me annou aksepte e fer viv nou bann diferans. Annou ansanm viv deba politik avek respe, dan dinite sak dimoun e dan ladiversite bann lopinyon politik.

Se par sa fason ki nou pou vin bann 'pelren Lesperans lo semen lape' parey lepap François pe envit nou viv, tou dilon sa Lannen-Sent, lannen 2025.

Sa se mon swe pour tou pep Seselwa pour sa nouvo lannen 2025.



+ Alain Harel
LEVEK POR-VIKTORYA

21 Desanm 2024